



Äntwert vun der Madame Justizminister Elisabeth MARGUE a vum Här Inneminister Léon GLODEN op d’parlamentaresch Fro n°3160 vum 5. November 2025 vun den honorabelen Députéierten André BAULER an Simone BEISSEL zum Sujet "Interrogatoire digital".

1. Wéi dacks goufen an deene leschte fënnef Joer Prisonéier respektiv Untersuchungsprisonéier tëscht deenen zwee Prisongen an de respektive Geriichter hin- an hier transportéiert ? Gëtt et do konkret Zuelematerial aus de leschte fënnef Joer ?

Fir eng richtig Aschätzung vun den Zuelen ass et wichteg ze präziséieren, datt d’Transporter tëschent deenen zwee Prisongen an de respektive Geriichter allgemeng just 1/3 vun de Missiounen vum Service vun der Unité de Garde et d’Appui Opérationnel (Service de Garde et de Protection), dee mat esou Transporter beoptraagt ass, ausmaachen. Zu deenen Transporter do kommen ënner anerem dann nach Transporter fir medezinesch Visitten, Transporter zwëscht de Prisonge selwer, wéi och Transporter aus dem Centre de Rétention an der UNISEC, dobäi.

Donieft huet de Service de Garde et de Protection och nach eng Rei weider Missiounen, wéi:

- Huissiersdénsgscht während de Sitzungen op de Geriichter an der Stad Lëtzebuerg an zu Dikrech
- Rapatriementer
- Ausliwwerungen (entrant an sortant) vu Stroftäter
- Uerdnungsdénsgchter am European Convention Center Luxembourg (ECCL)
- Uerdnungsdénsgchter an der Chamber
- Kontrollen am ëffentlechen Transport

Wat just déi gefroten Zuelen ugeet, huet d’Police an de leschten 3 Joer follgend Unzuel un Transporter tëschent deene verschiddene Prisongen an deene verschiddene Geriichter an der Stad Lëtzebuerg an zu Dikrech gemaach:

2023	2492 Transporter
2024	2072 Transporter
2025 (bis den 31/10/2025)	2117 Transporter

Virun 2023 sinn d’Zuelen zu dësen Transporter net erfaasst ginn.

Et ass ze erwänen, dass allgemeng d’Zuel vu Gefaangenentransporter déi zwee lescht Joren erofgaangen ass. Sou ass d’Unzuel u Gefaangenentransporter, pro Prisonéier gekuckt, säit 2024 ëm 8% erofgaangen an déi verschidden Acteuren um Terrain schaffen drun, fir dës Transporter weider ze reduzéieren.



2. Wéi dacks hu misse Polizisten aus de Kommissariater ofgezu ginn, fir dës Aarbecht ze verrichten ? Wéi vill Leit waren all Kéier betraff ?

Et ass net méiglech ze bestëmmen, wéi vill vun de Renforte just fir d'Transporter tëschent de Prisongen an de Geriichter agesat goufen.

De Service vun der Unité de Garde et de Protection vun der Police huet folgend Unzuel u Renforte vun de Kommissariater aus deenen verschiddenen Police-Regioune kritt:

2023	441 Renforten
2024	598 Renforten
2025 (bis den 31/10/2025)	1340 Renforten

Dës Renforte si fir alleguer d'Missiounen agesat ginn, déi de Service de Garde et de Protection ze erfëllen huet, an déi an der Äntwert op déi éischt Fro exposéiert goufen.

3. Ënner wat fir Konditiounen kéint een, virun allem bei den Untersuchungsprisonéier, op de Wee vu Videokonferenzen goen – änlech wéi bei den Autopsien, wou Riichter sech per Videokonferenz bäischalte kënnen ?

D'Moossnamen, déi ergraff goufen, deelen sech op zwou Haaptachsen op.

Déi éischt Achs ass den allgemengen Ausbau vun der Videokonferenz. E substanziellen Effort gouf gemaach, fir d'Geriichtssäll mat engem Videokonferenz-System auszustatten, souwuel beim Beziirksgeriicht a bei der Cour supérieure de Justice an der Stad Lëtzebuerg, wéi och beim Beziirksgeriicht zu Dikrech. Dës System erméiglecht ënnert anerem dës Prozeduren iwwert Videokonferenz ze maachen:

- de Prononcé;
- d'Verhéiere vun den Zeien;
- d'Comparutioun vun de Parteien;
- Reunioun mat Experten.

Aktuell ginn all d'Sitzungen betreffend d'Ufro fir provisoersch Fräiloossung, déi am Laf vun der Instruktioun gestallt ginn an ënnert d'Kompetenz vun der Chambre du conseil falen, per Videokonferenz duerchgefouert. D'Videokonferenz kann och ëmmer benotzt gi fir d'Verhandlungen, déi virun der krimineller a korrekioneller Chamber gemaach ginn, op Basis vum Artikel 116, Paragraph 4 vum Code de procédure pénale.

Laut dem Artikel 553 vum Code de procédure pénale, kënnen d'Untersuchungsriichter d'Videokonferenz och notzen, wann déi Persoun, déi verhéiert soll ginn, hospitaliséiert ass (z.B. bei Verdacht op Drogen, déi geschléckt goufen).



Allerdéngs bleift et an der Praxis wichteg, fir den éischte Verhéier physesch am Büro vum Untersuchungsriichter ze maachen, fir eng direkt Evaluatioun vun der Persoun ze erlaben a fir se präzis mat de virgeworfene Faiten ze konfrontéieren an hiert Verhalen an hir Kierpersprooch ze observéieren.

Déi zweet Achs ass d'Ëmsetzung vun engem digitalen System fir d'Consultatioun vun de Strofdossieren.

E Pilotprojet gouf gestart, mat deem mëttelfristeg d'Untersuchungsprisonéier d'Méiglechkeet kréien, hire Strofdossier iwwer en Tablet aus dem Centre pénitentiaire Lëtzebuerg an dem Centre pénitentiaire Uerschterhaff ze consultéieren.

D'Tester sinn aktuell um Terrain amgaang an am Fall vun engem positive Resultat soll dës System dauerhaft agefouert ginn. Dës Moossname wäerten dozou bäidroen, d'Zuel vun den Gefaangenentransporter bei d'Gerichter substanzuell ze reduzéieren.

Lëtzebuerg, den 5. Dezember 2025

D' Justizministesch

(s.) Elisabeth Margue